



Inatsisartuni ilaasortaq  
Sara Olsvig

## Apeqqummut nr. 89-imut akissuteqaat

Asasara Sara Olsvig

Inatsisartut suleriaasianni § 37 naapertorlugu Naalakkersuisunut imaattumik apeqquaqarputit.

15. april 2014  
Postboks 1601  
3900 Nuuk  
Tlf. (+299) 34 50 00  
Fax (+299) 32 56 00  
E-mail: isiin@nanoq.gl  
www.nanoq.gl

*EU-p ukiumoortumik naatsorsuusiortarnermut inatsisaa pillugu apeqquut nr. 072-imut Naalakkersuisut akissuteqarput "Inuussutissarsiornermut Aqutsisoqarfiup aalajangersagassamut allaqqaakkamik suliaqarnissaa siunertaralugu killiffik pillugu Inuussutissarsiornermut, Aatsitassaqaqarnermut Suliffeqaqarnermullu Naalakkersuisoqarfiup aamma Inuussutissarsiornermut Aqutsisoqarfiup akornanni attaveqatigiittoqartuarsimavoq." Tassa imaappa ukiumoortumik naatsorsuusiortarnermut inatsit nutaaq Folketingimut saqqummiunneqareerpat Kalaallit Nunaannut atortuulersinneqassasoq Siunertarineqartoq?*

Matuma kingulianiittoq tunngavilersuutigineqarluni:

*EU-p ukiumoortumik naatsorsuusiortarnermut inatsisaata nutaap Kalaallit Nunaannut atortuulersinneqarsinnaanera pillugu apeqquutima siuliimut Naalakkersuisut ersernerlukannersumik akissuteqarput. Taamaammat matumuuna erseqqissumik paaserusuppara inatsisip Kalaallit Nunaannut atortuulersinneqarnissaa siunertarineqarnermoq.*

## Akissut:

Aallarniutigalugu ajuusaarutigissavara siusinnerusukkut akissuteqaatiga naammagisimannginnakku.

Naluneqanngitsutut Inatsisartut UPA 2014-imi imm. 79 suliarisussaavaat:  
"EU-p naatsorsuutinut malitassiaa Folketing-imit atortuulersinneqarlunilu akuersissutigineqareerpat, danskit ukiumut naatsorsuusiortarneq pillugu inatsisaat Kunngip peqqusineratigut Kalaallit Nunaanni aamma atortuulersinneqarnissaa siunertaralugu Naalakkersuisut naalagaaffimmumut saaffiginnissuteqaqqullugit Inatsisartut aalajangiiffigisassaattut siunnersuut."

Siunnersuut UKA 2013-imi suliarineqassasoq siunniunneqaqqaarsimagaluarpoq aammalu Naalakkersuisut siullermeerinninnissamut akissuteqaataanni allassimavoq:  
"Piffissami matumani Naalakkersuisut Erhvervs- og Vækstministereqarfimmik ilaatigut ukiumoortumik naatsorsuusiortarnermut inatsisip nutarternissaanut

*tunngasumik oqaloqatiginnereerpoq.*

*Siunnersuuteqartutuulli nunatsinni suliffeqarfiit ullutsinnut naleqquttumik inatsisilersornissaat Naalakkersuisut pingaartuutippaat. Tamanna pillugu siunnersuut ingerlatat nalinginnaasut naapertorlugit suliarineqareeruni, aammalu tusarniaassutigineqareeruni Inatsisartunut saqqummiunneqarumaarpoq.*

*Taamaattorli Kalaallit Nunaanni danskit inatsisaannik suli naammassineqanngitsumik aallartitsinissamut sioqqutsisumik Naalakkersuisut pituttuisumik pisussaaffileerusunngillat. Ukiumoortumik naatsorsuusiortarnermut inatsisip atuutsilernissaa, aammalu tamanna pillugu aalajangiussisoqannginnerani illua'tungerisanut pingaarutilinnut tusarniaassutigineqarsinnaasup Kalaallit Nunaannut atuutsilersitsinissamut inaarutaasumik siunnersuusiortoqarnissaa utaqqimaassallugu Naalakkersuisut eqqortuunerusutut isigaat.*

*Matuma aamma Inatsisartut siunnersuummik sukumiisumik naammassisamillu aalajangiussiffigisaqarsinnaanissaat isumannaassavaa.”*

Erhvervs- og Vækstministereqarfik ilisimatitsivoq siusinnerpaamik 2015-imi danskit inatsisaanni ukiumoortumik naatsorsuutitut malitassat atuutsinneqalersimanissaat naatsorsuutigineqartoq.

Akissuteqaammi allassimasutut Naalakkersuisut akissuteqaammi allassimasutut, inatsisit assigiinngitsut, ilanngullugu ukiumoortumik naatsorsuusiortarnermut inatsit, nutarterneqarnissaat siunertaralugu Erhvervs- og Vækstministereqarfimmud ingerlaavartumik oqaloqatiginninnerit ingerlappaat.

Namminersorneq pillugu inatsit naapertorlugi naalagaaffimmi inatsimmik Kalaallit Nunaannut atuutsilernissaq sioqqullugu Namminersorlutik Oqartussat oqaaseqaateqartartussaapput. Tamatuma kingorna naalagaaffimmi inatsimmik Kalaallit Nunaannut atuutsilernissaq pillugu peqqussutitut suleriaaseq nalinginnaasoq malillugu, naalagaaffimmi oqartussaasut namminneerlutik imaluunniit Naalakkersuisunit qinnuigineqarnertik malillugu tamanna pillugu peqqussummut missingiummik suliaqartarput nassiussisarlutillu. Tamatuma kingorna Naalakkersuisut naalakkersuisoqarfik suliaasaqarfimmud akisussaasuusoq aqqutigalugu imaluunniit naalagaaffimmi oqartussaasoq soqutigisaqartunik tusarniaasarpoq, taakkualu missingiummut ilanngunneqartarput.

Tamatuma kingorna siunnersuut inaarutaasoq Inatsisartunut oqaaseqaateqarnissaq pillugu Inatsisartut aalajangiiffigisassaattut siunnersuutitut saqqummiunneqartarpoq, takuuk Inatsisartut suleriaasianni § 33, imm. 4.

Taamaattumik uppersarsinnaavara ukiumoortumik naatsorsuusiortarnermut inatsisip Kalaallit Nunaannut atuutsinneqalersimasup nutarterneqarnissaanik Naalakkersuisut kissaateqarput aammalu tamanna pillugu Erhvervs- og Vækstministereqarfik oqaloqatigalugu, oqaatigineqartutut ministereqarfik ilisimatitsivoq siunnersuutip 2015 sioqqullugu naammassinissaa ilimanaateqanngitsoq.

Kisiannili Naalakkersuisut oqaatigisinnaangilaat inatsisip Kalaallit Nunaannut atuutsinneqalertussatut kissaatigineqartup, inatsit Danmarkimut atuutsinneqalersimasoq assigeqqinnaassagaa, tassami tamatumunnga tusarniaanerup ingerlanera aammalu Kalaallit Nunaannit kissaatigineqartut apeqqutaasussaapput, ilanngullugit Kalaallit Nunaannut suut naleqqunnersut.

Taamaattumik siunnersuutip ilusilersorneqarneranut peqataanissamut periarfissaqarani aammalu taassuma nalinginnaasumik tusarniaanermut suleriaaseq malillugu ingerlanneqarsimatinnagu, kiisalu aamma tamanna suleriaaseq nalinginnaasoq malillugu aamma Inatsisartut suleriaasianni § 33, imm. 4 naapertorlugu oqaaseqaateqarnissaq siunertaralugu Inatsisartunut saqqummiunneqarsimatinnagu, inatsisip suli suliarineqarsimanngitsup Kalaallit Nunaannut atuutsinneqalernissaanik danskit naalakkersuisuinut piumasareqqullugu Naalakkersuisut pisussaaffilerneqarnissaanik Inatsisartut aalajangiiffigisassa, Naalakkersuisut aamma inassutigisinnaangilaat imaluunniit tapersorsinnaanagu.

Inussiarnersumik inuulluaqqusilluta



Jens-Erik Kirkegaard